

Gereformeerde Kerk Bellville – 4 Desember 2016 – Aand

Sing vooraf staande: Skrifberyming 12-2:1, 2 (27:1, 2)

- 1 Ek geloof in God die Vader / wat almagtig, wys en trou,
Skepper is van alle dinge / en dit nog in wese hou.
Ek geloof in Jesus Christus, / wat ons in aanbidding eer:
Eengeboorne van die Vader, / in sy hoogheid onse Heer.
- 2 Hy wat deur die Gees ontvang is / – die geheimenis is groot! –
en gebore is uit Maria, / uit die maagdelike skoot.
Wat gely het toe Pilatus / onregsvonnis het gevel –
kruis en doodsmart ondergaan het, / al die angste van die hel.

Ons hulp is in die Naam van die Here wat die hemel en die aarde geskape het.

Geliefdes, genade en vrede vir u van God ons Vader en die Here Jesus Christus deur die kragtige werking van God die Heilige Gees.

Amen.

Psalm 92:1, 2 (p. 466)

- 1 Wie sou die HEER nie prys nie, / as weer met nuwe gloed / 'n rusdag ons begroet?
Wie Hom nie dank bewys nie / in stille môrewagte, / as ons sy guns omring?
Wie vir sy trou nie sing / 'n loflied in die nagte?
- 2 Wie sou die troue HEER nie – / Hom wat sy gunste ons bied – / met hooggestemde lied
by harp- en luitspel eer nie? / Hy maak weer los my bande, / Hy maak my tong weer vry;
ek roem sy dae bly, / die werke van sy hande.

Gebed

Psalm 146:2, 3 (p. 700)

- 2 Moet op prinse nie vertrou nie, / by wie niemand heil kan vind –
op die mens jou hoop nie bou nie; / want as God hul gees ontbind,
keer hul na die aarde weer / en hul raadslag stort terneer.
- 3 Salig hy wat in die lewe, / sonder hulp en sonder raad,
as hom alles wil begewe, / vlug tot God, sy toeverlaat;
en ook in die swartste nag / op die HERE alleen bly wag.

Skriflesing: Genesis 22:1-14; Hebreërs 11:1-19;
Heidelbergse Kategismus, Sondag 7:21-23

Kernvers: Hebreërs 11:3, 17-19

Deur die geloof verstaan ons dat die wêreld deur die woord van God toeberei is, sodat die dinge wat gesien word, nie ontstaan het uit sienlike dinge nie.

Deur die geloof het Abraham, toe hy op die proef gestel is, Isak geoffer; ja, hy wat die beloftes ontvang het, het sy eniggeborene geoffer van wie gesê is: In Isak sal jou nageslag genoem word – want hy het gereken dat God mag het om selfs uit die dode op te wek; daaruit het hy hom ook, om so te spreek, terug ontvang.
(Hebreërs 11:3, 17-19 AFR53)

Heidelbergse Kategismus

Vraag 21: Wat is 'n ware geloof?

Antwoord: 'n Ware geloof is nie alleen 'n vasstaande kennis waardeur ek alles wat God in sy Woord aan ons geopenbaar het vir waar aanvaar nie (a), maar ook 'n vaste vertrouwe (b) wat die Heilige Gees (c) deur die evangelie in my hart werk (d), naamlik dat God nie net aan ander nie, maar ook aan my uit loutere genade, slegs op grond van die verdienste van Christus (e), vergewing van sondes, ewige geregtigheid en saligheid (f) geskenk het.

(a) Jak 2:19. (b) Heb 11:1, 7; Rom 4:18-21; 10:10; Efes 3:12; Heb 4:16; Jak 1:6. (c) Gal 5:22; Matt 16:17; 2 Kor 4:13; Joh 6:29; Efes 2:8; Fil 1:19; Hand 16:14. (d) Rom 1:16; 10:17; 1 Kor 1:21; Hand 10:44; 16:14. (e) Efes 2:8; Rom 3:24; 5:19; Luk 1:77, 78. (f) Rom 1:17; Gal 3:11; Heb 10:10, 38; Gal 2:16.

Vraag 22: Wat moet 'n Christen glo?

Antwoord: Alles wat in die evangelie aan ons beloof word (a) en wat die artikels van ons algemene en ongetwyfelde Christelike geloof ons in hoofsaak leer.

(a) Joh 20:31; Matt 28:19; Mark 1:15.

Vraag 23: Hoe lui die artikels?

Antwoord: (1) Ek glo in God die Vader, die Almagtige, die Skepper van die hemel en die aarde. (2) En in Jesus Christus, sy eniggebore Seun, ons Here; (3) wat ontvang is van die Heilige Gees, gebore uit die maagd Maria; (4) wat gely het onder Pontius Pilatus, gekruisig is, gesterf en begrawe is en neergedaal het na die hel; (5) wat op die derde dag opgestaan het uit die dood; (6) opgevaar het na die hemel en sit aan die regterhand van God, die almagtige Vader, (7) waarvandaan Hy sal kom om die lewendes en die dooies te oordeel. (8) Ek glo in die Heilige Gees. (9) Ek glo aan 'n heilige, algemene Christelike kerk, die gemeenskap van die heiliges; (10) die vergewing van sondes; (11) die opstanding van die liggaam (12) en 'n ewige lewe.

Tema: Die ware geloof waardeur ons gered word

Geliefdes in ons Here Jesus Christus, in die vorige gesprek tussen die vraagsteller en die gelowige het die gelowige vanuit die Bybel aangetoon dat nie alle mense deur Christus gered word soos wat hulle in Adam verlore gegaan het nie. Nie alle mense maak hulle ore oop en luister wanneer die Here met hulle praat nie. Intendeel, hulle verhard hulle teen die woorde van die Here en wil niks daarmee te doen hê nie. Daar is ook sommige wat vir ons lyk of hulle regtig glo in Christus, maar met verloop van tyd raak hulle heeltemal weg en wil ook niks meer met die Here en sy Woord te doen hê nie. Of hulle name is nog iewers op 'n lidmaatregister en hulle woon nog eredienste by, maar in werklikheid leef hulle eerder vir die wêreld en hulleself as vir die Here. Jesus vertel ons van sulke mense in die gelykenis van die saaiër. Dit is eintlik net **die mense wat deur 'n ware geloof in Christus ingelyf is en wat al Christus se weldade** as hulle eie **aanneem**, wat gered is.

Hierdie antwoord laat die vraagsteller beseft dat geloof die verskil maak tussen mense. Alle mense is sonder onderskeid sondaars, maar as gevolg van die verskil wat geloof maak, kry jy gelowige sondaars en ongelowige sondaars. Daar is tog baie mense wat sê dat hulle glo. Is almal wat so sê dan deur Christus gered? Na aanleiding van Jesus se woorde in die gelykenis van die saaiër sal die gelowige hierop nee moet antwoord. Ware geloof is nie maar net woorde nie. Ware geloof neem 'n mens se verstand, hart en hande oor. Luister hoe die gelowige sy vraagsteller geantwoord het.

Ware geloof bestaan uit twee wesenslike sake waarby ons hele menswees betrokke is. Hierdie twee wesenslike sake is kennis en vertrouwe. **Ware geloof is 'n vasstaande kennis.**

Deur die geloof verstaan ons dat die wêreld deur die woord van God toeberei is, sodat die dinge wat gesien word, nie ontstaan het uit sienlike dinge nie.
(Hebreërs 11:3 AFR53).

Op die eerste bladsy van die Bybel lees ons dat God die hemel en die aarde geskep het. Aanvanklik was daar niks nie behalwe ons Drie-enige God. Hy is van ewigheid af God. En God net gesê: Laat daar lig wees, en daar was lig. Ons weet hierdie dinge, want ons hoor hoe God dit vir ons in sy Woord vertel.

Met hierdie woorde in vers 3 word beklemtoon dat die ware geloof in staat is om God se majestueuse krag in die skepping waar te neem. Dit is immers net deur die geloof dat gelowiges hierdie stelling kan aanvaar dat **die dinge wat gesien word, nie ontstaan het uit sienlike dinge nie** (Hebreërs 11:3 AFR53).

Maar ons weet nie net iets van die skepping nie. Vanuit die openbaring van die Here het ons ook kennis van Noag, Abraham, Israel, die profete, die ballingskap, die geboorte, lewe en werk van Jesus Christus, en oor die werk van God die Heilige Gees deur die apostels en die kerk. Ons weet almal daarvan, want ons kan almal die Bybel lees. Trouens, enige mens kan die Bybel lees en kennis oor hierdie sake verkry. 'n Mens lees mos 'n boek om kennis te versamel.

Ja, sê die vraagsteller, almal wat die Bybel lees kan kennis daaruit versamel, maar is dit vir almal vasstaande kennis? Glo almal dat dit die waarheid is? Nee, nie almal aanvaar die Bybel as waarheid nie. Die Moslems, byvoorbeeld, weet ook van Jesus Christus en hulle ken ook sy uitsprake dat Hy die Christus is, die Seun van die lewende God. Hierdie kennis versamel hulle uit die Bybel uit, maar hulle betwis die waarheid daarvan. Daarom is hulle kennis oor Jesus Christus nie 'n vasstaande kennis nie.

Vasstaande kennis, aan die ander kant, is kennis wat nie deur enige sweempie van dwaalleer van stryk gebring kan word nie. Deur middel van dié vasstaande kennis aanvaar ons dat alles wat in die Bybel geskryf staan die reïne waarheid is, want die Bybel is God se openbaring aan mense. Ons aanvaar die Bybel as die geopenbaarde waarheid van God **veral omdat die Heilige Gees in ons hart getuig dat** dit die Woord **van God is** (Nederlandse Geloofsbelydenis, Artikel 5). En aangesien die Heilige Gees in ons hart daarvan getuig, maak Hy ook ons oë oop om die bewyse van die herkoms van die Bybel in die Bybel self raak te sien.

Die Here het immers sy Woord aan ons gegee sodat ons Hom as God kan leer ken. Hy openbaar Homself regdeur die Skrif as die Waaragtige God in wie daar geen leuen is nie. En soos wat die Here self is, so is sy Woord ook – die volle waarheid. In die Bybel is daar geen leuen geskryf nie.

Ja, daar is inderdaad gedeeltes in die Bybel wat vir ons moeilik is om te verstaan. Daar is byvoorbeeld die vertellings van die skepping van die wêreld in Genesis wat ons weet waar is. En dan is daar ook ontdekkings in die wêreld soos van die fossiele van diere wat nie meer bestaan nie. Daar is mense wat die ontdekkings in die wêreld gebruik om te sê dat die skeppingsverhaal van Genesis nie die waarheid kan wees nie.

Dit is hier waar die gelowige wysheid nodig het. Omdat ons mense nie die kennis van die ontdekkings presies by die skeppingsverhaal van Genesis kan uitbring nie, beteken nie dat die Here vir ons 'n storiëtjie in Genesis opgedis het nie. Ons moet altyd beseft dat mense se meetinstrumente en verstaanvermoëns ver tekort skiet teenoor God se meet-

instrumente en verstaanvermoë. Miskien sal ons in hierdie lewe nooit weet hoe die kennis uit die wetenskap presies by die vertellings in Genesis inpas nie. Dit bring egter nie die ware gelowige van stryk nie, want hy weet dat die Here Homself in sy Woord openbaar sodat ons Hóm sal ken as die Skepper van die ganse skepping. Die Here het sy Woord nie aan die mens gegee om in die eerste plek die skepping van die Skepper te leer ken nie.

Die Heilige Gees is immers in die gelowiges teenwoordig om hulle in die volle waarheid in te lei. Dit is Hy wat ons die Bybel laat verstaan en ken. Hy lei ons in die waarheid in en bewerk hierdie vasstaande kennis waardeur ons alles wat in die Bybel geopenbaar is vir waar aanvaar. Daarom kan ons sonder enige twyfel hardop sê: Ons weet **dat die wêreld deur die woord van God toeberei is, sodat die dinge wat gesien word, nie ontstaan het uit sienlike dinge nie** (Hebreërs 11:3 AFR53). Nou kan die Moslems ook met allerhande verstandelike argumente aangaande Jesus Christus se lewe en werk na ons toe kom. Ons sal nie van stryk gebring kan word nie. Deur die werk van die Heilige Gees weet ons verseker dat Jesus Christus werklik die Seun van God is wat vir ons sondes aan die kruis gesterf het en weer opgestaan het.

Maar die ware geloof is nie net 'n vasstaande kennis dat alles in die Bybel die waarheid is nie. Ware geloof is nie net 'n saak van ons verstand nie. As ons net met alles wat in die Bybel geskryf staan, saamstem en as die waarheid aanvaar, is ons op gelyke voet met die duiwels. Die duiwels glo dat daar net een God is soos dit in die Bybel geopenbaar word. Hulle aanvaar dit as die volle waarheid, want hulle weet verseker daar is net een God – **en hulle sidder van ang**s (Jakobus 2:19 AFR83), skryf Jakobus. Hoewel hulle die Bybel as die waarheid aanvaar, weier hulle volstrek om God te aanbid. Hulle buig eerder voor die gevalle skepsel Satan as voor God.

'n Mens wat net verstandelik instem met die Bybel en die Bybel as die waarheid aanvaar sonder dat sy hart daardeur geraak word, het nog nie die ware geloof nie. Hy het nog net 'n stuk iets wat historiese geloof genoem word. Dit is 'n oppervlakkige geloof waarby die hart van die mens nie by die God van die Bybel betrokke is nie. Daarom bely ons dat ware geloof ook 'n vaste vertroue is.

By Abraham sien ons so 'n ware geloof raak. Die Here het Homself aan Abraham bekend gemaak sodat Abraham Hom kon ken. Die Here het net vir Abraham gesê om te trek na die land wat Hy vir hom sal aanwys, en Abraham het geluister. Ware geloof maak dat 'n mens reageer wanneer die Here spreek, jy kan nie anders nie. Deur die werking van die Heilige Gees het Abraham geweet dat dit God is wat hom roep.

... en hy het weggetrek sonder om te weet waar hy sou kom.
(Hebreërs 11:8 AFR53)

Maar hy het getrek, want deur die woord van God wat hy gehoor het, het die Heilige Gees ook vertroue in sy hart opgewek.

'n Vaste vertroue op die Here van die Bybel word daarin duidelik dat 'n mens God onvoorwaardelik gehoorsaam, want jy ken Hom as die God van waarheid. Abraham het nie eers die moontlikhede oorweeg wat vir hom die beste sou wees nie. Toe God roep, het hy weggetrek sonder om te weet waar hy sou uitkom. Maar omdat die Here die God van waarheid is, het Abraham die versekering gehad dat waarheen die Here hom ook al lei die beste is. Daarom, en dit is nog 'n aspek van ware geloof, was Abraham bereid en gereed om wat vir hom bekend was prys te gee ter wille van wat die Here wou hê hy moes doen.

Hierdie ware geloof wat die Heilige Gees in Abraham bewerk het, word veral duidelik geopenbaar as die Here hom beveel om Isak te gaan offer. Abraham het God geken as die

God van waarheid. Oor 'n tydperk van vyf en twintig jaar het die Here telkens aan hom be-
loof dat hy 'n nageslag uit Sara sou hê. Maar Sara was onvrugbaar. Tog het Abraham die
Here geglo, want ware geloof maak dat 'n mens meer en meer beseft dat jy afhanklik is van
God se werk om sy beloftes waar te laat word. Ja, daar was 'n tyd toe Abraham deur
kleingeloof oorval is. Na tien jaar wat hy die belofte van 'n nageslag ontvang het, het die
kleingeloof so die oorhand op Abraham gekry dat hy ook gedink het sy nageslag eerder uit
Hagar as uit Sara gebore sou word.

Maar op die bestemde tyd het die Here vir Abraham die beloofde seun gegee. Toe Abra-
ham honderd jaar oud was, is Isak uit Sara gebore. Abraham het nou nog meer as ooit die
versekering gehad. Hierdie God wat hom geroep het en wat hy ken, is regtig die God van
waarheid, want Hy bly getrou. God hou Homself aan sy woord. 'n Mens kan die Here ten
volle vertrou. Die kennis oor God wat Abraham oor die baie jare van God self gekry het
deur sy woorde en werke het nou regtig diep in sy hart ingesink. Sy hart is aangeraak deur
die vasstaande kennis.

Hoewel God beoef het dat Abraham se nageslag uit Isak gebore sou word, het die Here
hom tog op die proef gestel. Die Here het Abraham beveel om sy seun, sy enigste seun,
die seun wat hy liefhet, Isak, te gaan offer. Omdat Abraham geglo het – omdat hy die Here
geken het en sy vertrou ten volle in die Here gestel het – het hy sonder twyfel, sonder
teëstribbeling Isak as offer afgestaan. Abraham het vas geglo dat die Here nog steeds sy
nageslag uit Isak sou laat voortkom, al moes hy hom gaan offer. Daarom het hy geglo dat
God weer vir Isak uit die dood sou opwek nadat hy hom geoffer het. Omdat Abraham
vir God geken het, kon hy Hom ook vertrou. So 'n vasstaande kennis en vaste vertrou is
'n ware geloof.

Ons hoor die Here elke dag nog met ons praat wanneer ons Bybel lees. Die Heilige Gees
laat ons God leer ken as 'n betroubare God wat doen wat Hy beoef het. Hy tree reg en
regverdig op. Daarom, wanneer ons sy waarskuwings en beloftes hoor, kan ons Hom
sonder weifeling gehoorsaam. God sal ons nooit mislei nie. Ons kan Hom onvoorwaardelik
met vertrou gehoorsaam, want wat Hy wil hê ons moet doen en waarheen Hy ons wil lei
is vir ons net die beste.

Om die Here onvoorwaardelik te gehoorsaam is dieselfde as om die Here met die grootste
vrymoedigheid te gehoorsaam. Iemand wat vrymoedig doen wat God beveel, is nie skrik-
kerig dat wat hy doen verkeerd sal wees nie. Hy twyfel ook nie of wat hy doen die regte
ding is of nie. Hy doen dit bloot omdat God hom beveel het om dit te doen.

So 'n vaste vertrou verg 'n totale oorgawe van ons kant af, wat alleen kan gebeur as ons
totaal verander is. Hierdie soort vertrou kom nie uit onself na vore nie. Ons is van nature
skepties en twyfelagtig. Ons aanvaar en vertrou nie maklik iets of iemand nie, tensy ons
gesien het dit kan werk. Daarom moet daar in ons denke 'n totale verandering plaasvind.
So 'n verandering kan nie met menslike redenasies en oortuigings bewerk word nie, want
ons redenasies en oortuigings werk net as ons kan sien.

En nou kan ons die Here dank dat die Heilige Gees ook ons skeptiese en twyfelagtige
geaardheid oorwin. Die Heilige Gees werk hierdie vaste vertrou in ons hart. Deur middel
van sy werk binne-in ons kan ons die Here onvoorwaardelik en met groot vrymoedigheid
gehoorsaam en glo. Maar die werk van die Heilige Gees staan nie op losse skroewe nie.
Ons gehoorsaam die Here nie blindelings nie. Die fondament van ons vaste vertrou
staan vas. Die Heilige Gees bewerk die vaste vertrou in ons hart deur middel van die
evangelie. Hy leer ons die God van die Bybel en sy werk ken ter wille van ons. Hy leer

ons die liefdesdaad van die Vader in Jesus Christus ken. En dit staan alles geskryf in die Bybel. Die rede hoekom ons die Here vrymoedig in vaste vertroue kan gehoorsaam, kan nageslaan word in die Woord van God wat absolute waarheid is.

In hierdie woorde hoor 'n mens ook dat geloof waaragtig 'n gawe van God is. Deur die Heilige Gees gee die Here aan mense die vasstaande kennis en die vaste vertroue. Maar ons het steeds 'n verantwoordelikheid om te glo. Ons moet glo dat ons deel het aan die verlossing deur Jesus Christus.

Dit is op hierdie punt waar ons dan sien dat geloof 'n baie persoonlike saak is. Met die vasstaande kennis werk die Heilige Gees deur die evangelie so 'n vaste vertroue in die gelowige se hart dat hy reguit kan sê: **God het nie net aan ander nie, maar ook aan my uit loutere genade, slegs op grond van die verdienste van Christus, vergewing van sondes, ewige geregtigheid en saligheid geskenk.** My verantwoordelikheid in my redding deur Christus is dit: Ek moet met sekerheid weet en van harte vertrou dat ook ek uit loutere genade deel het aan die verlossing wat Christus gebring het.

Maar wat nou daarvan as iemand nog nie so 'n groot sekerheid het nie, het hy dan nie die ware geloof nie? Hierdie sekerheid kom ook nie uit die gelowige self nie. God gee dit in **verskillende trappe en nie vir almal in gelyke mate nie.** En God gee dit deurdat Hy ons die vrugte van sy werk in ons **met blydschap en heilige vreugde laat waarneem.** Die vrugte van sy werk is onder andere **'n kinderlike eerbied en respek vir God, droefheid oor die sondes en 'n honger en dors om te doen wat reg is in God se oë** (Dordtse Leerreëls, Hoofstuk 1, paragraaf 12).

God laat gelowiges hierdie vrugte al duideliker sien wanneer hulle die inhoud van hulle geloof al beter leer ken en hulle vertroue al vaster word dat wat in die evangelie beloof word ook vir hulle elkeen afsonderlik bedoel is. Dit beteken dat gelowiges die Bybel al meer moet bestudeer om daaraan te kan vashou en te verstaan wat in die Twaalf Artikels bely word. Wat in die evangelie beloof word en wat saamgevat word in die Twaalf Artikels is die inhoud van die ware geloof.

'n Ware geloof is lewensbelangrik, want net daardeur het 'n mens deel aan Christus en sy weldade, net daardeur word 'n mens salig. Mag die Heilige Gees elke gelowige lei sodat hy nie net by kennis sal vassteek en die vertroue vergeet nie, want kennis sonder vertroue is 'n historiese geloof. Mag die Heilige Gees hom ook lei dat hy nie net 'n emosionele opwelling as geloof beskou nie, want dan vertrou hy sonder om te ken. En so 'n geloof hou net 'n tyd lank. Laat ons bid dat die Heilige Gees die ware geloof in ons sal laat groei deur ons te lei in die inhoud van ons geloof sodat elkeen opreg kan sê: Ook aan my het God die verlossing geskenk.

Amen!

Slotgebed

Psalm 84:3, 6 (p. 425)

- 3 Welsalig is die mensekind / wat al sy sterkte^o in U mag vind,
en op mag gaan na Sions hoogte. / Wanneer hul haas van dors verkwyn,
dan is die HEER self hul fontein / waar dorsland smag van somerdroogte.
Ook sal 'n reën hul daar oordek / wat hul tot nuwe lewe wek.

6 'n Son en skild is onse HEER; / Hy sal genade gee en eer,
want Hy word nooit sy woord ontou nie: / Hy sal aan almal wat opreg
Hom dien en wandel in sy weg, / die goeie nimmermeer onthou nie.
Welsalig, HEER, wie op U bou, / aan U geheel hom toevertrou.

Die genade van ons Here Jesus Christus, die liefde God die Vader en die gemeenskap
van die Heilige Gees sal met elkeen van julle wees en bly.

Amen.

Ds Coenraad Vrey
Gereformeerde Kerk Bellville
4 Desember 2016